

# «Grischun digital» sco sfida centrala

La regenza grischuna respunda ad in'incumbensa parlamentara da deputada Angela Casanova-Marón (pld Razén)

DA MARTIN CABALZAR

■ **La digitalisaziun transfurma svelt ed a moda decisiva tant la societad sco l'economia. Da quest avis è era deputada Angela Casanova-Marón. Ensemen cun 54 consegnataris ha ella inoltrà in'incumbensa parlamentara en il cussegl grond. Prentendi vegn ina clestra strategia sco er in plan da mesiras che mussa co il chantun po occupar ina piazza a la testa da quest provediment digital cun ina rait a bindel superlad. La regenza è pronta d'acceptar la moziun, fa dentant valair tschertas resalvas.** Cun sia strategia «Svizra digitala» vul il cussegl federal posiziunar la Svizra a la testa dal mund digital cun stgaffir cundiziuns generalas attractivas e favuraivlas e quai tant per la societad sco per l'economia. Latiers tutga in'infrastructura cun ina rait a bindel superlad che è disponibla en tut la Svizra e quai per in pretsch favuraivel. Cun dretg sa basia la confederaziun tar l'extensiuon futura er vinavant sin la concorrenza dal martgà liber senza sa fixar sin ina tecnologia.



**La digitalisaziun progressescha svelt ed influenzescha a moda decisiva societad ed economia.**

MAD

## Bilantscha dal provediment digital en il Grischun

En sia bilantscha intermediara vegn l'administraziun chantunala a la conclusiuon ch'i na saja betg la finamira dal chantun d'accelerar singulas tecnologias tar ils purschiders, mabain da prender en mira da satisfar bain als basegns, «resguardond opimalmain las relaziuns topograficas da noss chantun». Il chantun vul intervegnir a moda situativa en regard al provediment d'interpresas e tschertgar e realisar soluziuns sveltas entaifer las zonas da bajegiar en il cas concret ed eventualmain era sustegnair talas finanzialmain.

## Ina schanza enorma per noss chantun.

L'incumbensadra *Angela Casanova* (Domat) è persuadida che la transfurmaziun digitala è ina «schanza enorma» per noss chantun, damai che plazzas da lavur de-

pendan adina damain dal lieu. Per pudair lavurar en citad, en conturns inspirants, en la champagna u en las muntognas dovria però in'infrastructura cun ina rait a bindel superlad, punctuescha Casanova.

Pervia da la grondezza dal chantun e pervi da sia structura d'abitar decentrala na possia il chantun betg occupar a temp util ina piazza a la testa dals concurrents sin il martgà liber. Gist perquai saja da supponer che stimulsi finanzials sajan necessaris. Impurtant saja ch'ins possia prender influenza sin il provediment cun 4 G e pli tard sin 5 G tar las vias d'access.

Angela Casanova e sutsegnaders incumbenseschon la regenza d'elavurar ina strategia sco er in plan da mesiras che mussa co ch'il chantun po occupar ina piazza a la testa dal provediment tras ina

infrastructura cun ina rait a bindel superlad. Plinavant duai la transfurmaziun digitala vegnir giuditgada permanentain e las consequenzas vegnir stimadas regularmain. Impurtanta en quest connex saja er ina politica da datas coerenta e progressiva perquai ch'il tema da la segirezza da las datas vegnia ad esser ina part integrala essenziala da la competitivitat, argumentescha Casanova.

## La regenza respunda

Era la regenza è da l'avis che la digitalisaziun transfurmia l'economia e la societad svelt ed en moda decisiva. «Ils impuls sin la societad d'infurmaziun e da savida ha in effect direct per il svilup economic e pon uschia influenzer positivamain la persistenza e la prosperitat», scriva la regenza. L'infrastructura da comunica-

ziun saja in element central da quest svilup. Process da fatschenta innovativs ed adattads e la globalisaziun vegnian ad avair in effect decisiv per mastergn, industria e turissem.

I saja in'incumbensa da mintga interpresa da giuditgar endretg questas midadas. Per las interpresas èsi decisiv ch'i stettia a dipsosiziun ina infrastructura da rait efficazia, fidada e segira. Grazia a las purschidas da differentas interpresas da telecommunicaziun existia in martgà correspudent e la concorrenza che resulta da quel na duaia betg vegnir impedita entras intervenziuns dal stadi.

## Mantegnair e stgaffir plazzas da lavur

Tenor la regenza è la digitalisaziun en il senn da la transfurmaziun digitala da

process e models da fatschenta er ina schanza per il Grischun cun ses abitadis decentralis. Ella porschia potenzial per mantegnair e per stgaffir plazzas da lavur novas e per satisfar als basegns dals giasts e da la populaziun indigena. I valia da profitar da questa schanza perquai che las plazzas da lavur vegnian er ad ir a perder pervia da la digitalisaziun. Consequentmain stoppian era las purschidas da scolaziun e furmaziun supplementara teugnair quint da questas midadas e da las pretensiuns modifitgadas.

## Surlaschar l'extensiuon da l'infrastructura al martgà

La regenza accentuescha ch'ella veglia restar tar la strategia vertenta da surlaschar l'amplificaziun ed extensiuon da l'infrastructura che progredescha spert al martgà che sa drizzia tenor ils basegns da la clientella. Tuttina saja impurtant d'analisar detagliadamain las sfidas actualas e futuras e d'identifitgar ils deficits ch'existan. La regenza è perquai era pronta d'elavurar ina strategia sco er in plan da mesiras correspudentas. En quest connex saja dentant era da resguardar ils midaments frequents sin plaun federal. «La realisaziun sco tala è dentant ina incumbensa dals purtaders locals u regionalis», pretenda la regenza. La rolla dal chantun saja ina rolla subsidiara. In subvenziunament general tras il chantun avessia in effect cuntraproductiv e saja perquai da refusar, scriva la regenza. Era la basa legala per in tal sustegn na saja betg avant maun.

Cunzunt sin ils secturs dal turissem e da la furmaziun saja la digitalisaziun ina sfida centrala. Perquai saja la regenza era pronta da sviluppar concepts che pertutgan pliras destinaziuns.

La regenza renda dentant attent ch'i na saja cun las resursas existents betg pussaivel da giuditgar las consequenzas che resultan da quai per l'entir Grischun. Eventualas mesiras en il Grischun stoppian sa basar sin il svilup tar la confederaziun.